

Y Gwir Anrh. Michael Gove AS  
Yr Ysgrifennydd Gwladol ar gyfer Ffyniant Bro, Tai a  
Chymunedau a'r Gweinidog Cysylltiadau  
Rhynglywodraethol.

4 Tachwedd 2022

Annwyl Michael

### Cysylltiadau rhynglywodraethol

Llongyfarchiadau ar eich penodiad diweddar fel Ysgrifennydd Gwladol.

Fel y byddwch yn ymwybodol o'n **gohobiaeth** yn gynharach eleni, mae fy Mhwyllgor (a'i ragflaenydd) wedi treulio cryn dipyn o amser yn craffu ar sut mae llywodraethau yn y DU yn cydweithio ac edrychwn ymlaen at gynnal perthnasoedd cynhyrchiol â chi wrth inni barhau â'r gwaith pwysig hwn.

Ym mis Gorffennaf 2022, gwnaethom **ysgrifennu** at y Gwir Anrhydeddus Greg Clark AS, yr Ysgrifennydd Gwladol ar y pryd ar gyfer Ffyniant Bro, Tai a Chymunedau, ynglŷn â chynigion ar gyfer Biliau'r DU i ddeddfu mewn meysydd datganoledig a chafwyd **ymateb** [Saesneg yn unig] defnyddiol ym mis Awst 2022.

Mae nifer o bwyntiau y byddem yn croesawu rhagor o eglurder yn eu cylch.

Gwnaethom ofyn nifer o gwestiynau penodol ynghylch ymgysylltu rhwng swyddogion Llywodraeth Cymru a Llywodraeth y DU. Roedd y rhain yn canolbwyntio ar gychwyn trafodaethau, amserlennu, a gwelliannau i Ffiliau'r DU. Wrth ymateb, dywedodd yr Ysgrifennydd Gwladol:

*"My officials proactively provide guidance and support on engagement to UK Government bill teams throughout a bill's development and parliamentary passage. Engagement at official level should take place when developing policy which could affect devolved matters, and this engagement should continue throughout the bill's passage, including the sharing of information to allow devolved government counterparts to make informed policy decisions. This*

*engagement is also important to identify where a UK government bill can include provisions within a devolved legislature's competence and enable timely pragmatic solutions to policy challenges to deliver for people of Wales freeing up devolved legislatures time whilst respecting their legislative competence via the legislative consent process."*

Byddem yn ddiolchgar o gael gwybod a yw'r canllawiau y cyfeirir atynt o natur ffurfiol, yn debyg i, er enghraifft, nodiadau canllaw ar ddatganioli neu gytundeb rhynglywodraethol, a hefyd a ydynt yn ymdrin â chynghor penodol ar amserlennu a'r cytundeb rhwng llywodraethau ar welliannau arfaethedig. Mae'r wybodaeth hon yn berthnasol i ni er mwyn helpu i ddeall sut y gallwn ni, a phwyllgorau eraill y Senedd, ymdrechu i ddylanwadu ar deddfwriaeth a basiwyd yn Senedd y DU y byddem mewn llawer o achosion yn disgwyl iddi gael ei gwneud gan y Senedd.

Byddai hefyd yn ddefnyddiol gwybod pam nad yw'r canllawiau y cyfeirir atynt bob amser yn cael eu dilyn (gweler ein llythyr gwreiddiol) a sut y gellir osgoi'r sefyllfa hon yn y dyfodol. Gall y diffyg ymgysylltu gael effaith ar ein gallu ni, a gallu'r Senedd, i gynnal gwaith craffu, sydd eisoes wedi'i gyfyngu gan y defnydd o Fil ar lefel y DU yn hytrach nag un yng Nghymru. Er enghraifft, o ran, er syndod, y Bil Ffyniant Bro ac Adfywio, dim ond yn ddiweddar rydym wedi cael memorandwm cydsyniad deddfwriaethol gan Lywodraeth Cymru tua 4 mis ar ôl i'r Bil gael ei osod yn Senedd y DU, gan "nad oedd Llywodraeth y DU wedi ymgysylltu fawr ddim [...] cyn i'r Bil gael ei gyflwyno ac oherwydd bod y Bil yn un cymhleth" (paragraff 3 o'r [memorandwm cydsyniad deddfwriaethol](#)).

Mae hyn yn codi nifer o faterion:

1. A yw'r mater o nodi pryd y gall Bil Llywodraeth y DU gynnwys darpariaethau o fewn cymhwysedd deddfwrfa ddatganoledig yn ddarostyngedig i unrhyw fath o gytundeb rhynglywodraethol rhwng Llywodraeth Cymru a Llywodraeth y DU?
2. Lle ceir cytundeb rhwng llywodraethau, er enghraifft ar Fil Caffael Llywodraeth y DU, a fydd gohebiaeth Weinidogol yn cael ei chyfnewid i gytuno'n ffurfiol ar y safbwynt hwn ac, os felly, a oes unrhyw gyfyngiad y cytunwyd arno ar gyhoeddi gohebiaeth o'r fath a'i rhannu â'r seneddau perthnasol?
3. Ai safbwynt cytûn ac egwyddorol Llywodraeth y DU yw y dylai geisio rhyddhau amser yn y deddfwrfeydd datganoledig drwy gynnig deddfwriaeth ar lefel y DU (neu Brydain Fawr neu Gymru a Lloegr)?
4. Os mai dyma safbwynt Llywodraeth y DU, ar ba sail yr ydych wedi gwneud yr asesiad hwn, pam yr ydych yn ystyried hynny'n briodol, ac at ba ddiben?

5. A yw Llywodraeth Cymru wedi cysylltu â Llywodraeth y DU a defnyddio 'rhyddhau amser yn y deddfwrfeydd datganoledig' fel cyfiawnhad yn ystod trafodaethau ar gynnwys 'darpariaethau ar gyfer Cymru' ym Miliâu'r DU?
6. A yw'n wir mai'r hyn sy'n digwydd fwyaf aml yw bod Llywodraeth y DU yn gwneud cynnig i Lywodraeth Cymru i gynnwys darpariaethau mewn maes datganoledig o fewn Bil ar lefel y DU, neu a yw Llywodraeth Cymru yn gofyn yn rheolaidd am ddarpariaeth o'r fath?
7. A oes unrhyw amgylchiadau lle byddai Llywodraeth y DU yn ystyried ei bod yn amhriodol cynnwys darpariaethau mewn Bil ar lefel y DU o fewn cymhwysedd deddfwrfeydd datganoledig? A allwch roi enghraifft?
8. A oes unrhyw amgylchiadau lle byddai Llywodraeth y DU yn gwrthod cais gan Lywodraeth Cymru i gynnwys darpariaeth mewn Bil ar lefel y DU o fewn cymhwysedd deddfwrfeydd datganoledig? A allwch roi enghraifft?

Edrychaf ymlaen at gael eich ymateb o fewn chwe wythnos i ddyddiad y llythyr hwn.

Yn gywir

*Huw Irranca-Davies*

Huw Irranca-Davies

Cadeirydd

